

---

# Shri Ram Charit Manas

---

## श्री राम चरित मानस

---

### Document Information

---

Text title : Shri Ram Charit Manas - kishkindhakand

File name : manas4\_i.itx

Category : raama, tulasIdAsa, hindi

Location : doc\_z\_otherlang\_hindi

Author : Goswami Tulasidas

Transliterated by : Mr. Balram J. Rathore, Ratlam, M.P., a retired railway driver

Description-comments : Awadhi, Converted from ISCII to ITRANS

Acknowledge-Permission: Dr. Vineet Chaitanya, vc@iiit.net

Latest update : March 12, 2015

Send corrections to : sanskrit at cheerful dot c om

---

This text is prepared by volunteers and is to be used for personal study and research. The file is not to be copied or reposted without permission, for promotion of any website or individuals or for commercial purpose.

**Please help to maintain respect for volunteer spirit.**

---

Please note that proofreading is done using Devanagari version and other language/scripts are generated using **sanscript**.

---

February 13, 2024

*sanskritdocuments.org*

---

श्री राम चरित मानस



॥ राम ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

चतुर्थ सोपान

(किष्किन्धाकाण्ड)

श्लोक

कुन्देन्दीवरसुन्दरावतिबलौ विज्ञानधामावुभौ  
शोभाढ्यौ वरधन्विनौ श्रुतिनुतौ गोविप्रवृन्दप्रियौ।  
मायामानुषरूपिणौ रघुवरौ सद्धर्मवर्माँ हितौ  
सीतान्वेषणतत्परौ पथिगतौ भक्तिप्रदौ तौ हि नः ॥ १ ॥

ब्रह्माम्भोधिसमुद्भवं कलिमलप्रध्वंसनं चाव्ययं  
श्रीमच्छम्भुमुखेन्दुसुन्दरवरे संशोभितं सर्वदा।  
संसारामयभेषजं सुरवकरं श्रीजानकीजीवनं  
धन्यास्ते कृतिनः पिबन्ति सततं श्रीरामनामामृतम् ॥ २ ॥

सो. मुक्ति जन्म महि जानि ग्यान खानि अघ हानि कर

जहँ बस संभु भवानि सो कासी सेइअ कस न ॥

जरत सकल सुर बृंद बिषम गरल जेहिँ पान किय।

तेहि न भजसि मन मंद को कृपाल संकर सरिस ॥

आगें चले बहुरि रघुराया। रिष्यमूक परवत निअराया ॥

तहँ रह सचिव सहित सुग्रीवा। आवत देखि अतुल बल सींवा ॥

अति समीत कह सुनु हनुमाना। पुरुष जुगल बल रूप निधाना ॥

धरि बटु रूप देखु तैं जाई। कहेसु जानि जियँ सयन बुझाई ॥

पठए बालि होहिँ मन मैला। भागौँ तुरत तजौँ यह सैला ॥

बिप्र रूप धरि कपि तहँ गयऊ। माथ नाइ पूछत अस भयऊ ॥

को तुम्ह स्यामल गौर सरीरा। छत्री रूप फिरहु बन बीरा ॥  
कठिन भूमि कोमल पद गामी। कवन हेतु बिचरहु बन स्वामी ॥  
मृदुल मनोहर सुंदर गाता। सहत दुसह बन आतप बाता ॥  
की तुम्ह तीनि देव महुँ कोऊ। नर नारायन की तुम्ह दोऊ ॥

दो. जग कारन तारन भव भंजन धरनी भार।

की तुम्ह अकिल भुवन पति लीन्ह मनुज अवतार ॥ १ ॥

कोसलेस दसरथ के जाए। हम पितु बचन मानि बन आए ॥  
नाम राम लछिमन दऊ भाई। संग नारि सुकुमारि सुहाई ॥  
इहाँ हरि निसिचर बैदेही। बिप्र फिरहिँ हम खोजत तेही ॥  
आपन चरित कहा हम गाई। कहहु बिप्र निज कथा बुझाई ॥  
प्रभु पहिचानि परेउ गहि चरना। सो सुख उमा नहिँ बरना ॥  
पुलकित तन मुख आव न बचना। देखत रुचिर बेष कै रचना ॥  
पुनि धीरजु धरि अस्तुति कीन्ही। हरष हृदयँ निज नाथहि चीन्ही ॥  
मोर न्याउ मैँ पूछा साई। तुम्ह पूछहु कस नर की नाई ॥  
तव माया बस फिरउँ भुलाना। ता ते मैँ नहिँ प्रभु पहिचाना ॥

दो. एकु मैँ मंद मोहबस कुटिल हृदय अग्यान।

पुनि प्रभु मोहि बिसारेउ दीनबंधु भगवान ॥ २ ॥

जदपि नाथ बहु अवगुन मोरें। सेवक प्रभुहि परैँ जानि भोरें ॥  
नाथ जीव तव मायाँ मोहा। सो निस्तरइ तुम्हारेहिँ छोहा ॥  
ता पर मैँ रघुबीर दोहाई। जानउँ नहिँ कछु भजन उपाई ॥  
सेवक सुत पति मातु भरोसेँ। रहइ असोच बनइ प्रभु पोसेँ ॥  
अस कहि परेउ चरन अकुलाई। निज तनु प्रगटि प्रीति उर छाई ॥  
तब रघुपति उठाइ उर लावा। निज लोचन जल सींचि जुडावा ॥  
सुनु कपि जियँ मानसि जानि ऊना। तैं मम प्रिय लछिमन ते दूना ॥  
समदरसी मोहि कह सब कोऊ। सेवक प्रिय अनन्यगति सोऊ ॥

दो. सो अनन्य जाकें असि मति न टरइ हनुमंत।

मैँ सेवक सचराचर रूप स्वामि भगवंत ॥ ३ ॥

देखि पवन सुत पति अनुकूला। हृदयँ हरष बीती सब सूला ॥  
नाथ सैल पर कपिपति रहई। सो सुग्रीव दास तव अहई ॥  
तेहि सन नाथ मयत्री कीजे। दीन जानि तेहि अभय करीजे ॥

सो सीता कर खोज कराइहि। जहँ तहँ मरकट कोटि पठाइहि ॥  
 एहि विधि सकल कथा समुझाई। लिए दुऔ जन पीठि चढाई ॥  
 जब सुग्रीवँ राम कहँ देखा। अतिसय जन्म धन्य करि लेखा ॥  
 सादर मिलेउ नाइ पद माथा। भैँटैउ अनुज सहित रघुनाथा ॥  
 कपि कर मन बिचार एहि रीती। करिहहिँ बिधि मो सन ए प्रीती ॥

दो. तब हनुमंत उभय दिसि की सब कथा सुनाइ ॥

पावक साखी देइ करि जोरी प्रीती दृढाइ ॥ ४ ॥

कीन्ही प्रीति कछु बीच न राखा। लछमिन राम चरित सब भाषा ॥  
 कह सुग्रीव नयन भरि बारी। मिलिहि नाथ मिथिलेसकुमारी ॥  
 मंत्रिन्ह सहित इहाँ एक बारा। बैठ रहेउँ मैं करत बिचारा ॥  
 गगन पंथ देखी मैं जाता। परबस परी बहुत बिलपाता ॥  
 राम राम हा राम पुकारी। हमहि देखि दीन्हेउ पट डारी ॥  
 मागा राम तुरत तेहिं दीन्हा। पट उर लाइ सोच अति कीन्हा ॥  
 कह सुग्रीव सुनहु रघुबीरा। तजहु सोच मन आनहु धीरा ॥  
 सब प्रकार करिहउँ सेवकाई। जेहि बिधि मिलिहि जानकी आई ॥

दो. सखा बचन सुनि हरषे कृपासिधु बलसीव।

कारन कवन बसहु बन मोहि कहहु सुग्रीव ॥ ५ ॥

नात बालि अरु मैं द्वौ भाई। प्रीति रही कछु बरनि न जाई ॥  
 मय सुत मायावी तेहि नाऊँ। आवा सो प्रभु हमरें गाऊँ ॥  
 अर्ध राति पुर द्वार पुकारा। बाली रिपु बल सहै न पारा ॥  
 धावा बालि देखि सो भागा। मैं पुनि गयउँ बंधु सँग लागा ॥  
 गिरिबर गुहाँ पैठ सो जाई। तब बाली मोहि कहा बुझाई ॥  
 परिखेसु मोहि एक परववारा। नहिँ आवौं तब जानेसु मारा ॥  
 मास दिवस तहँ रहेउँ खरारी। निसरी रुधिर धार तहँ भारी ॥  
 बालि हतेसि मोहि मारिहि आई। सिला देइ तहँ चलेउँ पराई ॥  
 मंत्रिन्ह पुर देखा बिनु साई। दीन्हेउ मोहि राज बरिआई ॥  
 बालि ताहि मारि गृह आवा। देखि मोहि जियँ भेद बढ़ावा ॥  
 रिपु सम मोहि मारोसि अति भारी। हरि लीन्हेसि सर्वसु अरु नारी ॥  
 ताकें भय रघुबीर कृपाला। सकल भुवन मैं फिरेउँ बिहाला ॥  
 इहाँ साप बस आवत नाहीं। तदपि सभित रहउँ मन माहीं ॥

सुनि सेवक दुख दीनदयाला। फरकि उठीं द्वै भुजा बिसाला ॥

दो. सुनु सुग्रीव मारिहउँ बालिहि एकहि बान।

ब्रह्म रुद्र सरनागत गएँ न उबरिहिँ प्रान ॥ ६ ॥

जे न मित्र दुख होहिँ दुखारी। तिन्हहि बिलोकत पातक भारी ॥  
निज दुख गिरि सम रज करि जाना। मित्रक दुख रज मेरु समाना ॥  
जिन्ह केँ असि मति सहज न आई। ते सठ कत हठि करत मितार्ई ॥  
कुपथ निवारि सुपंथ चलावा। गुन प्रगटे अवगुनन्हि दुरावा ॥  
देत लेत मन संक न धरई। बल अनुमान सदा हित करई ॥  
बिपति काल कर सतगुन नेहा। श्रुति कह संत मित्र गुन पहा ॥  
आगें कह मृदु बचन बनाई। पाछें अनहित मन कुटिलाई ॥  
जा कर चित अहि गति सम भाई। अस कुमित्र परिहरेहि भलाई ॥  
सेवक सठ नृप कृपन कुनारी। कपटी मित्र सूल सम चारी ॥  
सखा सोच त्यागहु बल मोरें। सब बिधि घटब काज मैं तोरें ॥  
कह सुग्रीव सुनहु रघुबीरा। बालि महाबल अति रनधीरा ॥  
हुँदुभी अस्थि ताल देखराए। विनु प्रयास रघुनाथ ढहाए ॥  
देखि अमित बल बाढी प्रीती। बालि बधब इन्ह भइ परतीती ॥  
बार बार नावइ पद सीसा। प्रभुहि जानि मन हरष कपीसा ॥  
उपजा ग्यान बचन तब बोला। नाथ कृपाँ मन भयउ अलोला ॥  
सुख संपति परिवार बडाई। सब परिहरि करिहउँ सेवकाई ॥  
ए सब रामभगति के बाधक। कहहिँ संत तब पद अवराधक ॥  
सत्रु मित्र सुख दुख जग माहीं। माया कृत परमारथ नाहीं ॥  
बालि परम हित जासु प्रसादा। मिलेहु राम तुम्ह समन बिषादा ॥  
सपनें जेहि सन होइ लराई। जागें समुझत मन सकुचाई ॥  
अब प्रभु कृपा करहु एहि भाँती। सब तजि भजनु करौं दिन राती ॥  
सुनि बिराग संजुत कपि बानी। बोले बिहँसि रामु धनुपानी ॥  
जो कछु कहेहु सत्य सब सोई। सखा बचन मम मृषा न होई ॥  
नट मरकट इव सबहि नचावत। रामु खगोस वेद अस गावत ॥  
लै सुग्रीव संग रघुनाथा। चले चाप सायक गहि हाथा ॥  
तब रघुपति सुग्रीव पठावा। गर्जेसि जाइ निकट बल पावा ॥  
सुनत बालि क्रोधातुर धावा। गहि कर चरन नारि समुझावा ॥  
सुनु पति जिन्हहि मिलेउ सुग्रीवा। ते द्वौ बंधु तेज बल सीवा ॥

कोसलेस सुत लछिमन रामा। कालहु जीति सकहिं संग्रामा ॥

दो. कह बालि सुनु भीरु प्रिय समदरसी रघुनाथ।

जौं कदाचि मोहि मारहिं तौ पुनि होउँ सनाथ ॥ ७ ॥

अस कहि चला महा अभिमानी। तन समान सुग्रीवहि जानी ॥  
भिरे उभौ बाली अति तर्जा । मुठिका मारि महाधुनि गर्जा ॥  
तब सुग्रीव बिकल होइ भागा। मुष्टि प्रहार बज्र सम लागा ॥  
मैं जो कहा रघुबीर कृपाला। बंधु न होइ मोर यह काला ॥  
एकरूप तुम्ह भ्राता दोऊ। तेहि भ्रम तें नहिं मारेउँ सोऊ ॥  
कर परसा सुग्रीव सरीरा। तनु भा कुलिस गई सब पीरा ॥  
मेली कंठ सुमन कै माला। पठवा पुनि बल देइ बिसाला ॥  
पुनि नाना विधि भई लराई। बिटप ओट देखहिं रघुराई ॥

दो. बहु छल बल सुग्रीव कर हियँ हारा भय मानि।

मारा बालि राम तब हृदय माझ सर तानि ॥ ८ ॥

परा बिकल महि सर के लागें। पुनि उठि बैठ देखि प्रभु आगें ॥  
स्याम गात सिर जटा बनाएँ। अरुन नयन सर चाप चढ़ाएँ ॥  
पुनि पुनि चितइ चरन चित दीन्हा। सुफल जन्म माना प्रभु चीन्हा ॥  
हृदयँ प्रीति मुख बचन कठोरा। बोला चितइ राम की ओरा ॥  
धर्म हेतु अवतरेहु गोसाई। मारेहु मोहि ब्याध की नाई ॥  
मैं बैरी सुग्रीव पिआरा। अवगुन कवन नाथ मोहि मारा ॥  
अनुज बधू भगिनी सुत नारी। सुनु सठ कन्या सम ए चारी ॥  
इन्हहि कुदृष्टि बिलोकइ जोई। ताहि बधेँ कछु पाप न होई ॥  
मुठ तोहि अतिसय अभिमाना। नारि सिखावन करसि न काना ॥  
मम भुज बल आश्रित तेहि जानी। मारा चहसि अधम अभिमानी ॥

दो. सुनहु राम स्वामी सन चल न चातुरी मोरि।

प्रभु अजहूँ मैं पापी अंतकाल गति तोरि ॥ ९ ॥

सुनत राम अति कोमल बानी। बालि सीस परसेउ निज पानी ॥  
अचल करौं तनु राखहु प्राणा। बालि कहा सुनु कृपानिधाना ॥  
जन्म जन्म मुनि जतनु कराहीं। अंत राम कहि आवत नाहीं ॥  
जासु नाम बल संकर कासी। देत सबहि सम गति अविनासी ॥  
मम लोचन गोचर सोइ आवा। बहुरि कि प्रभु अस बनिहि बनावा ॥

छं. सो नयन गोचर जासु गुन नित नेति कहि श्रुति गावहीं।  
जिति पवन मन गो निरस करि मुनि ध्यान कबहुँक पावहीं ॥  
मोहि जानि अति अभिमान बस प्रभु कहेउ राखु सरीरही।  
अस कवन सठ हठि काटि सुरतरु बारि करिहि बबूरही ॥ १ ॥

अब नाथ करि करुना बिलोकहु देहु जो बर मागऊँ।  
जेहि जोनि जन्मौ कर्म बस तहँ राम पद अनुरागऊँ ॥  
यह तनय मम सम बिनय बल कल्याणप्रद प्रभु लीजिए।  
गहि बाहँ सुर नर नाह आपन दास अंगद कीजिए ॥ २ ॥

दो. राम चरन दृढ प्रीति करि बालि कीन्ह तनु त्याग।  
सुमन माल जिमि कंठ ते गिरत न जानइ नाग ॥ १० ॥

राम बालि निज धाम पठावा। नगर लोग सब ब्याकुल धावा ॥  
नाना बिधि बिलाप कर तारा। छूटे केस न देह सँभारा ॥  
तारा बिकल देखि रघुराया। दीन्ह ग्यान हरि लीन्ही माया ॥  
छिति जल पावक गगन समीरा। पंच रचित अति अधम सरीरा ॥  
प्रगट सो तनु तव आगें सोवा। जीव नित्य केहि लागि तुम्ह रोवा ॥  
उपजा ग्यान चरन तब लागी। लीन्हेसि परम भगति बर मागी ॥  
उमा दारु जोषित की नाई। सबहि नचावत रामु गोसाई ॥  
तब सुग्रीवहि आयसु दीन्हा। मृतक कर्म विधिबत सब कीन्हा ॥  
राम कहा अनुजहि समुझाई। राज देहु सुग्रीवहि जाई ॥  
रघुपति चरन नाइ करि माथा। चले सकल प्रेरित रघुनाथा ॥

दो. लछिमन तुरत बोलाए पुरजन विप्र समाज।  
राजु दीन्ह सुग्रीव कहँ अंगद कहँ जुबराज ॥ ११ ॥

उमा राम सम हित जग माहीं। गुरु पितु मातु बंधु प्रभु नाहीं ॥  
सुर नर मुनि सब कै यह रीती। स्वारथ लागि करहिँ सब प्रीती ॥  
बालि त्रास ब्याकुल दिन राती। तन बहु ब्रन चिंताँ जर छाती ॥  
सोइ सुग्रीव कीन्ह कपिराऊ। अति कृपाल रघुबीर सुभाऊ ॥  
जानतहुँ अस प्रभु परिहरहीं। काहे न बिपति जाल नर परहीं ॥  
पुनि सुग्रीवहि लीन्ह बोलाई। बहु प्रकार नृपनीति सिखाई ॥  
कह प्रभु सुनु सुग्रीव हरीसा। पुर न जाउँ दस चारि बरीसा ॥  
गत ग्रीषम बरषा रितु आई। रहिहउँ निकट सैल पर छाई ॥

अंगद सहित करहु तुम्ह राजू। संतत हृदय धरेहु मम काजू ॥  
जब सुग्रीव भवन फिरि आए। रामु प्रबरषन गिरि पर छाए ॥

दो. प्रथमहिं देवन्ह गिरि गुहा राखेउ रुचिर बनाइ।

राम कृपानिधि कछु दिन बास करहिंगे आइ ॥ १२ ॥

सुंदर बन कुसुमित अति सोभा। गुंजत मधुप निकर मधु लोभा ॥  
कंद मूल फल पत्र सुहाए। भए बहुत जब ते प्रभु आए ॥  
देखि मनोहर सैल अनूपा। रहे तहँ अनुज सहित सुरभूपा ॥  
मधुकर खग मृग तनु धरि देवा। करहि सिद्ध मुनि प्रभु कै सेवा ॥  
मंगलरूप भयउ बन तब ते । कीन्ह निवास रमापति जब ते ॥  
फटिक सिला अति सुभ्र सुहाई। सुख आसीन तहाँ द्वौ भाई ॥  
कहत अनुज सन कथा अनेका। भगति विरति नृपनीति बिबेका ॥  
बरषा काल मेघ नभ छाए। गरजत लागत परम सुहाए ॥

दो. लछिमन देखु मोर गन नाचत बारिद पैखि।

गृही विरति रत हरष जस बिष्नु भगत कहँ देखि ॥ १३ ॥

घन घमंड नभ गरजत घोरा। प्रिया हीन डरपत मन मोरा ॥  
दामिनि दमक रह न घन माहीं। खल कै प्रीति जथा थिर नाहीं ॥  
बरषहिं जलद भूमि निअराएँ। जथा नवहिं बुध बिद्या पाएँ ॥  
बूँद अघात सहहिं गिरि कैसें। खल के बचन संत सह जैसें ॥  
छुद्र नदीं भरि चलीं तोराई। जस थोरेहुँ धन खल इतराई ॥  
भूमि परत भा ढाबर पानी। जनु जीवहि माया लपटानी ॥  
समिटि समिटि जल भरहिं तलावा। जिमि सदगुन सज्जन पहिं आवा ॥  
सरिता जल जलनिधि महुँ जाई। होई अचल जिमि जिव हरि पाई ॥

दो. हरित भूमि तृन संकुल समुझि परहिं नहिं पंथ।

जिमि पाखंड बाद तें गुप्त होहिं सदग्रंथ ॥ १४ ॥

दादुर धुनि चहु दिसा सुहाई। बेद पढहिं जनु बटु समुदाई ॥  
नव पल्लव भए बिटप अनेका। साधक मन जस मिलें बिबेका ॥  
अर्क जबास पात बिनु भयऊ। जस सुराज खल उद्यम गयऊ ॥  
खोजत कतहुँ मिलइ नहिं धूरी। करइ क्रोध जिमि धरमहि दूरी ॥  
ससि संपन्न सोह महि कैसी। उपकारी कै संपति जैसी ॥  
निसि तम घन खद्योत बिराजा। जनु दंभिन्ह कर मिला समाजा ॥



महावृष्टि चलि फूटि किआरीं । जिमि सुतंत्र भएँ बिगरहिं नारीं ॥  
 कृषी निरावहिं चतुर किसाना । जिमि बुध तजहिं मोह मद माना ॥  
 देखिअत चक्रबाक खग नाहीं । कलिहि पाइ जिमि धर्म पराहीं ॥  
 ऊषर बरषइ तृन नहिं जामा । जिमि हरिजन हियँ उपज न कामा ॥  
 विविध जंतु संकुल महि भ्राजा । प्रजा बाढ जिमि पाइ सुराजा ॥  
 जहँ तहँ रहे पथिक थकि नाना । जिमि इंद्रिय गन उपजें ग्याना ॥

दो. कबहुँ प्रबल बह मारुत जहँ तहँ मेघ बिलाहिं ।

जिमि कपूत के उपजें कुल सद्धर्म नसाहिं ॥ १५(क) ॥

कबहुँ दिवस महँ निबिड तम कबहुँक प्रगट पतंग ।

बिनसइ उपजइ ग्यान जिमि पाइ कुसंग सुसंग ॥ १५(ख) ॥

बरषा विगत सरद रितु आई । लछिमन देखहु परम सुहाई ॥  
 फूलें कास सकल महि छाई । जनु बरषाँ कृत प्रगट बुढाई ॥  
 उदित अगस्ति पंथ जल सोषा । जिमि लोभहि सोषइ संतोषा ॥  
 सरिता सर निर्मल जल सोहा । संत हृदय जस गत मद मोहा ॥  
 रस रस सूख सरित सर पानी । ममता त्याग करहिं जिमि ग्यानी ॥  
 जानि सरद रितु खंजन आए । पाइ समय जिमि सुकृत सुहाए ॥  
 पंक न रेनु सोह असि धरनी । नीति निपुन नृप कै जसि करनी ॥  
 जल संकोच विकल भइँ मीना । अबुध कुटुंबी जिमि धनहीना ॥  
 बिनु धन निर्मल सोह अकासा । हरिजन इव परिहरि सब आसा ॥  
 कहँ कहँ वृष्टि सारदी थोरी । कोउ एक पाव भगति जिमि मोरी ॥

दो. चले हरषि तजि नगर नृप तापस बनिक् भिखारि ।

जिमि हरिभगत पाइ श्रम तजहि आश्रमी चारि ॥ १६ ॥

सुखी मीन जे नीर अगाधा । जिमि हरि सरन न एकउ बाधा ॥  
 फूलें कमल सोह सर कैसा । निर्गुन ब्रह्म सगुन भएँ जैसा ॥  
 गुंजत मधुकर मुखर अनूपा । सुंदर खग रव नाना रूपा ॥  
 चक्रबाक मन दुख निसि पैखी । जिमि दुर्जन पर संपति देखी ॥  
 चातक रटत तृषा अति ओही । जिमि सुख लहइ न संकरद्रोही ॥  
 सरदातप निसि ससि अपहरई । संत दरस जिमि पातक टरई ॥  
 देखि इंदु चकोर समुदाई । चितवतहिं जिमि हरिजन हरि पाई ॥  
 मसक दंस बीते हिम त्रासा । जिमि द्विज द्रोह किएँ कुल नासा ॥

दो. भूमि जीव संकुल रहे गए सरद रितु पाइ।

सदगुर मिले जाहिं जिमि संसय भ्रम समुदाइ ॥ १७ ॥

बरषा गत निर्मल रितु आई। सुधि न तात सीता कै पाई ॥  
 एक बार कैसेहुँ सुधि जानौं। कालहु जीत निमिष महुँ आनौं ॥  
 कतहुँ रहउ जौं जीवति होई। तात जतन करि आनेउँ सोई ॥  
 सुग्रीवहुँ सुधि मोरि बिसारी। पावा राज कोस पुर नारी ॥  
 जेहिं सायक मारा मैं बाली। तेहिं सर हतौं मूढ कहँ काली ॥  
 जासु कृपाँ छूटहीं मद मोहा। ता कहँ उमा कि सपनेहुँ कोहा ॥  
 जानहिं यह चरित्र मुनि ग्यानी। जिन्ह रघुबीर चरन रति मानी ॥  
 लछिमन क्रोधवंत प्रभु जाना। धनुष चढाइ गहे कर बाना ॥

दो. तब अनुजहि समुझावा रघुपति करुना सीव ॥

भय देखाइ लै आवहु तात सखा सुग्रीव ॥ १८ ॥

इहाँ पवनसुत हृदयँ बिचारा। राम काजु सुग्रीवँ बिसारा ॥  
 निकट जाइ चरनन्हि सिरु नावा। चारिहु विधि तेहि कहि समुझावा ॥  
 सुनि सुग्रीवँ परम भय माना। विषयँ मोर हरि लीन्हेउ ग्याना ॥  
 अब मारुतसुत दूत समूहा। पठवहु जहँ तहँ बानर जूहा ॥  
 कहहु पाख महुँ आव न जोई। मोरें कर ता कर बध होई ॥  
 तब हनुमंत बोलाए दूता। सब कर करि सनमान बहूता ॥  
 भय अरु प्रीति नीति देखाई। चले सकल चरनन्हि सिर नाई ॥  
 एहि अवसर लछिमन पुर आए। क्रोध देखि जहँ तहँ कपि धाए ॥

दो. धनुष चढाइ कहा तब जारि करउँ पुर छार।

ब्याकुल नगर देखि तब आयउ बालिकुमार ॥ १९ ॥

चरन नाइ सिरु बिनती कीन्ही। लछिमन अभय बाँह तेहि दीन्ही ॥  
 क्रोधवंत लछिमन सुनि काना। कह कपीस अति भयँ अकुलाना ॥  
 सुनु हनुमंत संग लै तारा। करि बिनती समुझाउ कुमारा ॥  
 तारा सहित जाइ हनुमाना। चरन बंदि प्रभु सुजस बखाना ॥  
 करि बिनती मंदिर लै आए। चरन पखारि पलँग बैठाए ॥  
 तब कपीस चरनन्हि सिरु नावा। गहि भुज लछिमन कंठ लगावा ॥  
 नाथ विषय सम मद कछु नाहीं। मुनि मन मोह करइ छन माहीं ॥  
 सुनत बिनीत बचन सुख पावा। लछिमन तेहि बहु विधि समुझावा ॥

पवन तनय सब कथा सुनाई। जेहि विधि गए दूत समुदाई ॥

दो. हरषि चले सुग्रीव तब अंगदादि कपि साथ।

रामानुज आगें करि आए जहँ रघुनाथ ॥ २० ॥

नाइ चरन सिरु कह कर जोरी। नाथ मोहि कछु नाहिन खोरी ॥  
अतिसय प्रबल देव तब माया। छूटइ राम करहु जौं दाय। ॥  
विषय बस्य सुर नर मुनि स्वामी। मैं पावँर पसु कपि अति कामी ॥  
नारि नयन सर जाहि न लागा। घोर क्रोध तम निसि जो जागा ॥  
लोभ पाँस जेहिं गर न बँधाय। सो नर तुम्ह समान रघुराया ॥  
यह गुन साधन तें नहिं होई। तुम्हरी कृपाँ पाव कोइ कोई ॥  
तब रघुपति बोले मुसकाई। तुम्ह प्रिय मोहि भरत जिमि भाई ॥  
अब सोइ जतनु करहु मन लाई। जेहि विधि सीता कै सुधि पाई ॥

दो. एहि विधि होत बतकही आए बानर जूथ।

नाना बरन सकल दिसि देखिअ कीस बरुथ ॥ २१ ॥

बानर कटक उमा में देखा। सो मूरुख जो करन चह लेखा ॥  
आइ राम पद नावहिं माथा। निरखि बदनु सब होहिं सनाथा ॥  
अस कपि एक न सेना माहीं। राम कुसल जेहि पूछी नाहीं ॥  
यह कछु नहिं प्रभु कइ अधिकाई। बिस्वरूप व्यापक रघुराई ॥  
ठाठे जहँ तहँ आयसु पाई। कह सुग्रीव सबहि समुझाई ॥  
राम काजु अरु मोर निहोरा। बानर जूथ जाहु चहुँ ओरा ॥  
जनकसुता कहँ खोजहु जाई। मास दिवस महँ आएहु भाई ॥  
अवधि मेटि जो विनु सुधि पाएँ। आवइ बनिहि सो मोहि मराएँ ॥

दो. बचन सुनत सब बानर जहँ तहँ चले तुरंत ।

तब सुग्रीवँ बोलाए अंगद नल हनुमंत ॥ २२ ॥

सुनहु नील अंगद हनुमाना। जामवंत मतिधीर सुजाना ॥  
सकल सुभट मिलि दच्छिन जाहू। सीता सुधि पूँछेउ सब काहू ॥  
मन क्रम बचन सो जतन बिचारेहु। रामचंद्र कर काजु सँवारेहु ॥  
भानु पीठि सेइअ उर आगी। स्वामिहि सर्व भाव छल त्यागी ॥  
तजि माया सेइअ परलोका। मिटहिं सकल भव संभव सोका ॥  
देह धरे कर यह फलु भाई। भजिअ राम सब काम विहाई ॥  
सोइ गुनग्य सोई बडभागी । जो रघुवीर चरन अनुरागी ॥

आयसु मागि चरन सिरु नाई। चले हरषि सुमिरत रघुराई ॥  
 पाछें पवन तनय सिरु नावा। जानि काज प्रभु निकट बोलावा ॥  
 परसा सीस सरोरुह पानी। करमुद्रिका दीन्हि जन जानी ॥  
 बहु प्रकार सीतहि समुझाएहु। कहि बल बिरह बेगि तुम्ह आएहु ॥  
 हनुमत जन्म सुफल करि माना। चलेउ हृदयँ धरि कृपानिधाना ॥  
 जद्यपि प्रभु जानत सब बाता। राजनीति राखत सुरत्राता ॥

दो. चले सकल बन खोजत सरिता सर गिरि खोह।

राम काज लयलीन मन बिसरा तन कर छोह ॥ २३ ॥

कतहुँ होइ निसिचर सैं भेटा। प्रान लेहिँ एक एक चपेटा ॥  
 बहु प्रकार गिरि कानन हेरहिँ। कोउ मुनि मिलत ताहि सब घेरहिँ ॥  
 लागि तृषा अतिसय अकुलाने। मिलइ न जल घन गहन भुलाने ॥  
 मन हनुमान कीन्ह अनुमाना। मरन चहत सब बिनु जल पाना ॥  
 चढि गिरि सिखर चहुँ दिसि देखा। भूमि बिबिर एक कौतुक पेखा ॥  
 चक्रबाक बक हंस उडाहीं। बहुतक खग प्रबिसहिँ तेहि माहीं ॥  
 गिरि ते उतरि पवनसुत आवा। सब कहुँ लै सोइ बिबर देखावा ॥  
 आगें कै हनुमंतहि लीन्हा। पैठे बिबर बिलंबु न कीन्हा ॥

दो. दीख जाइ उपवन वर सर बिगसित बहु कंज।

मंदिर एक रुचिर तहुँ बैठि नारि तप पुंज ॥ २४ ॥

दूरि ते ताहि सबन्हि सिर नावा। पूछें निज वृत्तांत सुनावा ॥  
 तेहिँ तब कहा करहु जल पाना। खाहु सुरस सुंदर फल नाना ॥  
 मज्जनु कीन्ह मधुर फल खाए। तासु निकट पुनि सब चलि आए ॥  
 तेहिँ सब आपनि कथा सुनाई। मैं अब जाब जहाँ रघुराई ॥  
 मूदहु नयन बिबर तजि जाहू। पैहहु सीतहि जनि पछिताहू ॥  
 नयन मूदि पुनि देखहिँ बीरा। ठाढे सकल सिंधु कें तीरा ॥  
 सो पुनि गई जहाँ रघुनाथा। जाइ कमल पद नाएसि माथा ॥  
 नाना भाँति बिनय तेहिँ कीन्ही। अनपायनी भगति प्रभु दीन्ही ॥

दो. बदरीवन कहुँ सो गई प्रभु अग्या धरि सीस ।

उर धरि राम चरन जुग जे बंदत अज ईस ॥ २५ ॥

इहाँ बिचारहिँ कपि मन माहीं। बीती अवधि काज कछु नाहीं ॥  
 सब मिलि कहहिँ परस्पर बाता। बिनु सुधि लएँ करव का भ्राता ॥

कह अंगद लोचन भरि बारी। दुहुँ प्रकार भइ मृत्यु हमारी ॥  
 इहाँ न सुधि सीता कै पाई। उहाँ गएँ मारिहि कपिराई ॥  
 पिता बधे पर मारत मोही। राखा राम निहोर न ओही ॥  
 पुनि पुनि अंगद कह सब पाहीं। मरन भयउ कछु संसय नाहीं ॥  
 अंगद बचन सुनत कपि बीरा। बोलि न सकहिं नयन बह नीरा ॥  
 छन एक सोच मगन होइ रहे। पुनि अस वचन कहत सब भए ॥  
 हम सीता कै सुधि लिन्हें बिना। नहिं जैहैं जुबराज प्रबीना ॥  
 अस कहि लवन सिंधु तट जाई। बैठे कपि सब दर्भ डसाई ॥  
 जामवंत अंगद दुख देखी। कहिं कथा उपदेस बिसेषी ॥  
 तात राम कहूँ नर जानि मानहु। निर्गुन ब्रह्म अजित अज जानहु ॥

दो. निज इच्छा प्रभु अवतरइ सुर महि गो द्विज लागि।

सगुन उपासक संग तहँ रहहिं मोच्छ सब त्यागि ॥ २६ ॥

एहि विधि कथा कहहि बहु भाँती गिरि कंदराँ सुनी संपाती ॥  
 बाहेर होइ देखि बहु कीसा। मोहि अहार दीन्ह जगदीसा ॥  
 आजु सबहि कहँ भच्छन करऊँ। दिन बहु चले अहार बिनु मरऊँ ॥  
 कबहुँ न मिल भरि उदर अहारा। आजु दीन्ह विधि एकहिं बारा ॥  
 डरपे गीध बचन सुनि काना। अब भा मरन सत्य हम जाना ॥  
 कपि सब उठे गीध कहँ देखी। जामवंत मन सोच बिसेषी ॥  
 कह अंगद बिचारि मन माहीं। धन्य जटायू सम कोउ नाहीं ॥  
 राम काज कारन तनु त्यागी। हरि पुर गयउ परम बड भागी ॥  
 सुनि खग हरष सोक जुत बानी। आवा निकट कपिन्ह भय मानी ॥  
 तिन्हहि अभय करि पूछेसि जाई। कथा सकल तिन्ह ताहि सुनाई ॥  
 सुनि संपाति बंधु कै करनी। रघुपति महिमा बधुबिधि बरनी ॥

दो. मोहि लै जाहु सिंधुतट देउँ तिलांजलि ताहि ।

बचन सहाइ करवि मैँ पैहहु खोजहु जाहि ॥ २७ ॥

अनुज क्रिया करि सागर तीरा। कहि निज कथा सुनहु कपि बीरा ॥  
 हम द्वौ बंधु प्रथम तरुनाई । गगन गए रवि निकट उडाई ॥  
 तेज न सहि सक सो फिरि आवा । मैँ अभिमानी रवि निअरावा ॥  
 जरे पंख अति तेज अपारा । परेउँ भूमि करि घोर चिकारा ॥  
 मुनि एक नाम चंद्रमा ओही। लागी दया देखी करि मोही ॥

बहु प्रकार तेंहि ग्यान सुनावा । देहि जनित अभिमानी छडावा ॥  
 त्रेताँ ब्रह्म मनुज तनु धरिही। तासु नारि निसिचर पति हरिही ॥  
 तासु खोज पठइहि प्रभू दूता। तिन्हहि मिलें तैं होब पुनीता ॥  
 जमिहहिं पंख करसि जनि चिंता । तिन्हहि देखाइ देहेसु तैं सीता ॥  
 मुनि कइ गिरा सत्य भइ आजू । सुनि मम वचन करहु प्रभु काजू ॥  
 गिरि त्रिकूट ऊपर बस लंका । तहूँ रह रावन सहज असंका ॥  
 तहूँ असोक उपवन जहूँ रहई ॥ सीता बैठि सोच रत अहई ॥  
 दो. मैं देखउँ तुम्ह नाहि गीघहि दष्टि अपार ॥  
 बूढ भयउँ न त करतेउँ कछुक सहाय तुम्हार ॥ २८ ॥

जो नाघइ सत जोजन सागर । करइ सो राम काज मति आगर ॥  
 मोहि बिलोकि धरहु मन धीरा । राम कृपाँ कस भयउ सरीरा ॥  
 पापिउ जा कर नाम सुमिरहीं। अति अपार भवसागर तरहीं ॥  
 तासु दूत तुम्ह तजि कदराई। राम हृदयँ धरि करहु उपाई ॥  
 अस कहि गरुड गीघ जब गयऊ। तिन्ह कें मन अति बिसमय भयऊ ॥  
 निज निज बल सब काहूँ भाषा। पार जाइ कर संसय राखा ॥  
 जरठ भयउँ अब कहइ रिछेसा। नहिं तन रहा प्रथम बल लेसा ॥  
 जबहिं त्रिविक्रम भए खरारी। तब मैं तरुन रहेउँ बल भारी ॥

दो. बलि बाँधत प्रभु बाढेउ सो तनु बरनि न जाई।

उभय धरी महँ दीन्ही सात प्रदच्छिन धाइ ॥ २९ ॥

अंगद कहइ जाउँ मैं पारा। जियँ संसय कछु फिरती बारा ॥  
 जामवंत कह तुम्ह सब लायक। पठइअ किमि सब ही कर नायक ॥  
 कहइ रीछपति सुनु हनुमाना। का चुप साधि रहेहु बलवाना ॥  
 पवन तनय बल पवन समाना। बुधि बिबेक विग्यान निधाना ॥  
 कवन सो काज कठिन जग माहीं। जो नहिं होइ तात तुम्ह पाहीं ॥  
 राम काज लागि तब अवतारा। सुनतहिं भयउ पर्वताकारा ॥  
 कनक बरन तन तेज बिराजा। मानहु अपर गिरिन्ह कर राजा ॥  
 सिंहनाद करि बारहिं बारा। लीलहीं नाषउँ जलनिधि खारा ॥  
 सहित सहाय रावनहि मारी। आनउँ इहाँ त्रिकूट उपारी ॥  
 जामवंत मैं पूँछउँ तोही। उचित सिखावनु दीजहु मोही ॥  
 एतना करहु तात तुम्ह जाई। सीतहि देखि कहहु सुधि आई ॥  
 तब निज भुज बल राजिव नैना। कौतुक लागि संग कपि सेना ॥

- छं. -कपि सेन संग सँघारि निसिचर रामु सीतहि आनिहैं।  
त्रैलोक पावन सुजसु सुर मुनि नारदादि बखानिहैं ॥  
जो सुनत गावत कहत समुझत परम पद नर पावई।  
रघुवीर पद पाथोज मधुकर दास तुलसी गावई ॥
- दो. भव भेषज रघुनाथ जसु सुनहि जे नर अरु नारि।  
तिन्ह कर सकल मनोरथ सिद्ध करिहि त्रिसिरारि ॥ ३०(क) ॥
- सो. नीलोत्पल तन स्याम काम कोटि सोभा अधिक।  
सुनिअ तासु गुन ग्राम जासु नाम अघ खग बधिक ॥ ३०(ख) ॥  
मासपारायण, तेईसवाँ विश्राम

इति श्रीमद्रामचरितमानसे सकलकलिकलुषविध्वंसने  
चतुर्थ सोपानः समाप्तः।  
(किष्किन्धाकाण्ड समाप्त)

---

*Shri Ram Charit Manas*

pdf was typeset on February 13, 2024

---

Please send corrections to [sanskrit@cheerful.com](mailto:sanskrit@cheerful.com)

